

四庫全書

集部

欽定四庫全書

集部  
雪樓集卷二十五至  
七

詳校官中書臣羅錦森

侍讀臣孫球覆勘

總校官庶吉士臣朱 鈐

校對官編修臣楊壽楠

謄錄監生臣王泰雲

欽定四庫全書

雪樓集卷二十五

元 程文海 撰

題跋

書張鍊師詩後

大德九年冬承乏禁林有告以假館玉堂之東者明年  
春直學士李公繩之爲言月泉張鍊師之材因示其詩  
即假館者也余讀而驚焉既而師又以詩逮余余因得  
詳其本末噫嘻使遇合於當年操觚染翰豈必在徐宋

下哉夫文章乃宇宙間光霽之氣詩又其鏗鏘而共喜者若又出於不圖非望者之口則其喜益宜況又若師之波瀾老成乎方令文治鼎隆羣材彙進語有之唐虞之際於斯為盛余初驚焉將復愧之矣詩凡若干篇繩之學士靜軒承旨既為之序因書其後

徐充華唐太宗時妃嬪上書諫

征高麗者宋若昭開元時尚宮夫人有文學上令教六宮

跋金蕭輔國行狀

宇文虛中誌銘王鹿菴跋

志義幹略之臣何代無之顧不幸而當廢興之會往往

湮淪流沛其能少槩見者又未必聞於天下信於後世  
其間獨幸不與氣運俱盡且獲名流于今若輔國者所  
謂存十一於千百然則翰墨之功其可少哉王氏者蕭  
之中外諸孫也相與守此尚有典刑雖然鹿菴翁不笑  
吾贅乎

跋楊巽溪行狀

觀楊君西淮事因憶宋莒公其及物小大遠不同然彼  
則彰於人而此則終身幾無知者根深者發遲而巨吾

知人之報必厚於蟻之報也惻隱之心仁之端學者類能誦之若楊君者誠古之所謂君子哉

題安暹州同知黎承事安南志

廼者將指江漢頗聞陳王戲下有文雅之士今觀此志殆非虛傳漢交州七郡歲舉孝廉與中州齒以黎君之材擢而用之豈必後於他人顧獨以筆墨自娛於山湖間豈其職哉然余徒能言之尚庶幾見之

題任令迎侍贈言卷

聞昔循吏迎侍在官民有母子相訟者吏乃如常日侍膳曲盡事親之禮而俾訟者自庭下觀之訟者感悟自相尅責泣拜請罪吏曰未也如是者歷日訟者悔色見面乃戒而遣之由是風化大行令尹奉二親如山西而求言於搢紳意至美也若徒詠歎揚溢非令尹求言之本心用敢以所聞贈令尹蓋陽岡老人所知是行也將不爲令循吏乎千聞不如一見跂余望之

題李氏家集

余少與吳君幼清學於臨汝時人莫之知適部使者堂  
山李公來未始識面忽獨知余二人於數百人中待之  
者特異余二人自亦不知其何以辱此也後四十年余  
寓灤陽李東甫携其家集見示中有賀公登第之詩由  
是知東甫乃公族見元賓所與如元賓况公之諸孫且  
又能輯諸祖父羣從之作兼述平生疊疊歎歎惟懼久  
或失之嗟夫爲人後者不當若是耶余又因知李氏代  
有可稱而絕識遠致想不獨堂山公爲然也



跋山谷帖

涪翁嘗云作字貴指實掌虛臂不着紙今尋此卷筆勢知其真蹟不疑卞和之筭豈有燕石子文之謂也至大元年清明日觀

跋魏國公碑陰

至大元年平章軍國魏公欽承上命加恩三世樹碑宰上公又募勒前後加恩制者凡七于石惟太上有立德其次立功立言是之謂不朽今魏公父子祖孫世濟盛

美咸建勛績于皇家台鼎公珪峻赫相望雖畢原邗應  
文昭武穆無以尚之于以見聖天子報功錫類之仁而  
孝子慈孫之事備矣宣昭令猷宜永作則詩不云乎高  
山仰止景行行止欲知公之世德其必之魏觀之

跋長江萬里圖

岷江發源於徼外東女康延川東流入塞爲里不知其  
幾經越齟齬若三峽者又不知其幾然後至于灌口然  
則自灌口至夷山之陽特其下流耳而所經越齟齬又

若是人徒見其經地接天時不見其廻局逆折日與石  
遲時也噫豈惟水哉

題史侯修河詩卷

二千石民之父母也子有疾父母庸有弗知知之庸有  
不動心者故凡力之所得爲者無不爲也此之謂民之  
父母漢以六事察舉郡國而溝洫與其一焉是固二千  
石所當盡心吾觀序篇而後知史侯真民之父母也漢  
氏以來河爲中國大患至親屈萬乘臨塞又國因之誅

罰輔弼大臣使郡國有如史侯亦何攘攘至是哉嗟夫  
二千石真民之父母也然利之而不為興害之而不為  
除謬政暴令以忸其私是特狼羊耳顧且曰吾課當最  
嗟夫觀此得無少愧矣乎

跋雪齋墨蹟

余季父西渠公初以中二千石見雪齋先生先生贈以  
詩遂刻于石余每一摩挲感念疇昔於邑者久之觀此  
帖後牧菴杖淚之語則猶子之情蓋一也雪齋名迹不

下古人字畫亦非後來所及黃氏其永寶之

書郝子明贈行詩卷

傳曰當官而行何彊之有余觀郝君子明其所謂能官者歟鄉君行部盱撫余適里居君之為政余已見而知之暨留京五年談者誦君為內縣之敏至今未息及今使經東淮道塗之人言郝僉事郝僉事者余又聞而知之見所見聞所聞將人人能言君之政矣亦豈獨江淮間哉雷尊師方外士也談君尤吃吃不離口視余此卷

因書而歸之

跋張仲端所藏蘇才翁詩

以名臣孫子而壻相門材藝美茂又蓋一世使不處朋黨之朝猶為儉人妒媚況時方水火爭復高自置的如此其不闕弓者幾希惜哉余偶客沙羨仲端出以見示意悟飄洒如見平生且知張氏自尚書公寶藏至今世家風流文獻於此可覘子美知之亦足以慰然千秋萬歲名寂寞身後事憐才君子尚三嘆而有遺音廣平程

某觀

跋王衡父誌銘

廣平程某贊曰余觀黃叔度史家幾無能名其貴重蓋若是彼隨時之士何嘗不以聲名自詭而或終不見稱或返得詬焉者何耶王君之親山林務道者也而王君欲顯其親甚於身嗟夫務道顧不顯哉

書留犢畫卷

嘗有以留犢事聞于世祖皇帝帝曰彼在官得子亦肯

留否大哉聖言世或未之聞也史臣程某謹書

跋東平張氏所藏諸賢墨蹟

右自遺山至王詳議尺牘凡十四家二十七紙皆張氏所藏也觀尚書公所與不問可知其賢僕於卷中獨恨不及奉公與遺山杖屨若左山鹿庵復齋弘道子勉秋澗諸賢皆嘗從容左右而鹿菴上俾與游者也嗚呼前輩落筆見心無有避飾僕於此卷深有所感毋謂尺牘實足爲世道升降之驗惟子勉有一紙疑其家人小子



所書識者必能辨之仲端能世其家亦不多有僕因興  
感并志喜云廣平程某

跋墨竹葉卷

羅浮山竹人傳仙翁嘗畫符於葉上至今此山竹葉當  
中有黃文一道繆屈往復如蝸書如梵字方外者流折  
爲遠信且誇說而深神之道人喜幻也若湘江公安之  
竹則又出於思君去國貞節相符勁心同感者今坡公  
題名乃在治平不在熙寧紹聖而葉葉相傳留墨不絕

何爲其然也子不語怪方將順西江之途一訪視之

跋雪擁藍關圖

當舉世波流之中獨嶄然自立矚然不溷雖不識一字亦足爲堂堂正正大丈夫雪甚馬瘠身可屈節不可屈也花葉幻詩政與大顛書問一律觀此卷者但當賞筆墨形似之工耳

題晴川樂府

蘇詞如詩秦詩如詞此蓋意習所遣自不覺耳要之情

吾情味吾味雖不必同人亦不必彊人之同然一往無  
留如戴晉人之呖則亦安在其為寫中腸也哉余於近  
世諸家惟清真犂然當於心晴川樂府殊有宗風雨坐  
空山試閱一解便如輕衫駿騎上下五陵花發鶯啼垂  
楊拂面時也起敬起敬

跋徐長卿推官事蹟

徐君長卿潔廉方直薦紳知名嘗長盱幕熟於民情治  
要後之言善佐郡政者必君為首稱今以推劾之官再

莅此府年加而知益明氣老而節愈勁一府有廉吏千  
里無冤民省闔憲部咸器倚之凡難決易墨者悉以誨  
君君操正剴煩庭無留事百城觀聽為驚焉而余與君  
游從獨久知君才美無施不宜豈此一節足以盡其所  
長哉因覽此卷為書其後安得十數元道州百鮮于子  
駿古人所嘆余今亦云

跋周氏慈雲菴記後

右番禺周氏慈雲菴記一卷丞相江文忠公天下號為

能文李明通亦江左名士其記嚴且重若此非良載賢  
孝詎致此哉其子應極事令上春宮由集賢司直翰林  
待制復為集賢待制又能以其父所以事其母者事其  
母可謂世濟其美者矣周氏其益昌乎程某跋

跋宗人子冲家廣平譜

按廣平程氏分南北宗蓋自東晉以來相去千餘歲相  
望數千里今乃秩然若同居合席慨然有思遠念始之  
心譜叙之功大哉然書斷自唐虞太史公乃上泝黃帝

可謂博矣而叙舜為帝顓頊六世孫稱鯀為帝顓頊之子其信然邪則吾宗上自周大司馬下迄于今流離喪亂更歷變代或微或著可盡得譜而叙之邪而求其古今盛大蕃衍之端莫不繇積善累德而始是卷也亦篤近舉遠之意乎凡我同姓其毋忘譜牒之本皇慶改元二月朔日宗人某書

跋安南國王陳平章詩集

右平章政事安南國王集一卷詩二百三十樂府十皆

至元中歸朝後作皇慶元年入覲間以視余始獲讀之  
夫本以忠孝仁智之道博以詩書六藝之文更以艱難  
險阻之變韜以憂歡離合之情其居既殊所遇亦異故  
其落筆如大將治軍旅賢輔立朝廷紀律嚴明條令整  
肅而不失春容閒暇之意過人遠矣昔越裳氏慕周德  
而朝觀其辭令已知為詩禮之邦安南古越裳也自漢  
唐以來世多聞人覽此又疑非古所及已嗚呼其亦治  
世之音乎秋九月望日廣平程某謹書其後

跋吳氏經德堂記

安仁吳垧伯厚示余陸文安公所為乃祖經德堂記余  
幼嘗讀其文已謂發揮盛大非䟽虫魚釋草木者所可  
共語今又觀當日諸老題詠閱深暢達益不可徒以文  
字求烏乎諸賢遠矣師道不立心學不明聖人之書視  
為迂闊欲經德之不回難已伯厚年壯力贍氣和宜日  
夜孜孜切問而近思求名堂之本以紹先哲弗得弗措  
若令伯厚已不失為孝子慈孫况又光於今日哉世俗



窮達毫髮不足計也吾悔已晚矣伯厚勗之

跋酸齋詩文

右詩文一卷故勲臣楚國武定公之孫酸齋所作皇慶二年二月拜翰林侍讀學士與余同僚因出此橐余讀至洪弟之永州序懇款教告五七言詩長短句情景淪至廼歎曰妙年所詣已如此況他日所觀哉君初隸萬夫長政教並行居頃之遜其弟以學行見知於上而有令命余聽其言審其文蓋功名富貴有不足易其樂者

世德之流詎可涯哉

書柯自牧自序救荒事蹟後

人言救荒無良法余謂不然顧所行如何耳方大德之末天下旱蝗飢疫荐臻發粟之使相望於道而吳越齊魯之郊骨肉相食餓莩滿野行數十里不聞人聲此固天災然皆如右三君所陳亦可少庶幾矣嗚呼豈獨救荒爲然哉

王彥博元復初有跋皆自序救荒

跋揭景哲訪祖詩卷

按豐城揭氏出自盱之廣昌紹興八年分南豐為廣昌縣治揭坊者則未縣時揭氏固已盛矣而遷豐城者亦云自五季之亂至今兩族譜牒猶可考然廣昌之族祖楚司揭氏豐城之族祖漢安道侯何也余舊家郢郢中亦有揭氏其名炎發者嘗與鄉貢大德中余識其外孫許雲卿于武昌觀其所藏外祖譜牒亦祖司揭氏郢故楚都豈司揭氏之後為信耶抑世固有兩族耶而豐城之族既出廣昌不當所祖之異也必岐於夾漈之說此皆

遠不可考獨於景哲南海唱和詩卷令人起悠然之思

題菊隱堂卷

廣信孫君希文種菊象元觀之東偏構堂曰菊隱因其父所自號也初菊隱翁有子八人最幼者曰逢吉慶衍慶衍希文也翁年踰七袞二子尚少乃命入龍虎山事林性初為道士捐象山之麓舊宅一區田若干頃園地山林若干畝為象元觀以託二子翁沒二十餘年矣而希文高懷雅致浮遊南北視世如晴雲飛埃獨依依然

惟翁之思升堂若聞其音聲對菊若睹其儀形歷歷焉如翁始居嗚呼孝矣哉余聞學仙者以孝為本世無仙則已有則非君而誰何時登君之堂撫君之菊酌寒泉以酌翁也且問陸子靜讀書何所

跋子大本書度人經後

右度人經一部馮道恭求吾兒大本為書之刻本印施夫道家之書老莊不可及已此經其要本於大道辭甚詭而義甚密世俗日誦以求福田利益未必皆悟所謂

度人者馮本盱江人幼遭亂離羈旅京師獨好老氏之學不娶不茹葷酒浮湛市井間人鮮能知之蓋真志於老氏之流歟刻既成為書其後延祐元年三月某日

跋姚雪齋贈周定甫詩後

右少師姚文獻公贈周君定甫先生詩一卷定甫事世祖潛邸中統建元召為中書詳定官明年置行省平陽授左右司郎中又明年建十路宣慰司遷北京平灤廣寧宣慰司叅議至元元年詔以中書都事從姚公董選

西京平陽大原時姚公為左丞六年立提刑按察司僉  
河南按察司事姚公贈詩蓋此時也十年遷遼東副使  
十三年改江東宣慰副使十八年進湖南按察司居五  
年改湖北以翰林侍讀學士召竟引年謝歸定甫博學  
遠識所至立名節姚公與周旋久故知之深號一時賢  
公卿順德忠獻王之平章湖廣行省也用其子德貞為  
掾大德中余廉問湖北始識之渾然才德君子也延祐  
改元夏忽持是卷來謁嗚呼翰墨猶新典刑如昨余與

子亦俱老矣能無慨乎尚世守之哉六月日跋

跋李仲淵御史記楊耀卿塞河事後

余觀御史李君仲淵所記楊堅州盟津塞河事得三美焉夫河決之為中國患久矣至有勤天子臨塞之者今朝廷能以才選堅州堅州果能竭誠盡力不三旬而底功知人也功既上即拜陝西行省員外郎明賞也書稱彰善居瘴惡之先御史職近之仲淵能紀其事甚核而文不忘職也一舉而三美具焉善之善者也高山大河



神姦之所家赤蛇之事又何怪焉世有工歌者一發其音聲以繼宣房之作以鳴國家之盛則又善也

跋李仲淵作劉簡州墓誌銘後

右監察御史李仲淵所作劉簡州墓誌銘一首觀所載簡州單騎入劉整軍可謂勇而有謀者惜未究厥用以死仲淵筆力政欲以孤軍逐北封侯萬里者余却而避之矣延祐元年秋孟廣平程某跋

跋富珠哩种子輩編脩叙瘍醫盍彥澤孝義後

右史館編脩富珠哩卽子輦所叙瘍醫蓋彥澤孝義詳矣逢原待制復欲老朽着語于後是狐裘而羔袖之也辭不獲乃詳其本末贅之按彥澤乃祖伯仲以醫事金金滅復從太宗世祖征伐著勞蓋久伯氏既家燕仲氏居秦相去數千里皆一傳而微兩家十二喪未入土天道若有不可知者及伯母李以醫入宮彥澤因得以世業給事尚方彥澤方日夜以畢葬為憂而適有藩王之召受寵錫厚賚西道長安東還京師兩家之喪不再歲

而畢葬始知天道決非偶然此固彥澤孝心所致亦祖宗所積者厚也至於卹災捍患扶老慈幼事伯母如母嫁娶教育能竭力兩家如彥澤者抑又難矣嗟夫世之不幸如盍氏者衆矣有甚幸如盍氏者曾幾何人乃祖建之以忠乃孫承之以孝垂微而復為世所稱不亦甚可貴重哉延祐改元八月二十二日書

跋趙崇德應奉玉簪軒記

右翰林應奉恒山趙君崇德玉簪軒記一首君得意之

作不止此而以此名軒以此作記則世所未有也此花  
南北皆有之幽淡高素不在蘭蕙水仙下獨鮮稱於人  
何哉今不知君之遇玉簪乎玉簪之遇君乎不知世復  
有遇不遇若此者乎余三讀為之躍然以喜愀然以悲  
也書以識予感年月日跋

書贈準提師序後

夫動天地感鬼神莫大於誠故曰不誠無物昔嘗有一  
村媼每見人誦經心甚慕焉或戲以周氏千文為經授

之遂日夜誦念不止不知其非經也或告以為非經則  
怒越歲餘几案置粟豆皆自躍起媼信益篤京師薛氏  
婦久寡傭賃為食一日自言觀音夢授金剛準提呪日  
夜持誦可以已人之疾可以衣食終身既而果然人皆  
異之號曰準提師嗚呼彼以村媼心偶慕之而人授之  
其效尚如此況此以一無依之寡妾一旦得所謂觀音  
夢授又曰可以已人之疾又曰可以衣食終身宜何如  
其敬信之也而有不誠者乎莊周曰用志不分乃凝於

神夫神凝則誠矣經咒云乎哉燕喜老人趙國公求余書準提事因及村媪以見所以動天地感鬼神在誠而不在經咒也遂書所序之後

跋東坡邵茂誠詩集引墨蹟

右王君仲益所藏蘇文忠公邵茂誠詩集引墨蹟一卷觀蘇文忠所述茂誠蓋賢者也茂誠雖賢而身兼貧病不遇短命無子五窮天下誰復哀之者而茂誠亦不求哀於人者蘇公以天下之士一識於孫莘老家讀其文

叙其同年之好後十五年乃能哭其喪序其文哀其人  
拳拳若此茂誠亦卒托此以傳嗚呼此所以為蘇公也  
歟世之觀此帖而無所感發其心豈人也哉

跋知命堂記

孔子罕言命者何也若知之而不言乎則固曰吾無隱  
乎爾矣我叩其兩端而竭焉矣若以為不知乎則固曰  
不知命無以為君子矣小人不知天命而不畏矣且仁  
義禮智天之命也而君子則曰有性聲色安佚人之性

也而君子則曰有命然則脩吾之所當為而順天之所為斯可以謂之知命者歟讀斯記而嘆美張君之能以此得名於諸公間也因行其旨而歸之

書知止堂卷

詩云緡蠻黃鳥止于丘隅子曰於止知其所止可以人而不如鳥乎此證知止之義而深切著明者也今堂以知止名其可仕則仕可止則止者乎抑知止不殆者乎若曰知止而后有定則知之在心所止在至善是有學



問思辨之功焉而非歸休一堂以自安之謂也然則吾  
見其進未見其止

題涼國敏慧公畫像

延祐三年春詔臣某為涼國敏慧公碑銘翰林待制趙  
穆又示以公遺像紫衣玉帶端笏山立猶若有所奉時  
也為之歛衽三肅惟公位太師封大國其禮服在古則  
宜衮冕九章貂冠赤舄今聖天子稽古如堯一用文治  
於軍國之容將必有所述作然則安得復有如公者歟

承其間金玉王度乎至公之可贊者某亦既奉詔論撰著之無窮矣此不復贅

題蒲傳正墨蹟

周公躬吐握以下士漢相亦開東閣以延材後世乃禁宰相私第見客此任法不任人之弊也傳正一世高材器宇英邁觀其心畫所謂但恨二王無臣法得之文獻風流政爾似續伯長尚友之誼侑以謹言皆所謂使君於此不凡者耶

書開封張氏世譜後

右開封張氏世譜及徐國公以下碑志一卷按張氏當五季之亂徙自清河傳至于今十有四矣方宋盛時父子兄弟聯圭疊組布列中外或杖節鉞或秉樞轄或力諫以盡忠或殺身以著節仁謀義略英聲偉績焜耀載籍何其盛耶及宋祚南遷金源氏起中原為兵革之場世族故家磨滅幾盡而張氏丘壠之藏譜牒之載金石之刻猶宛然歸然不淪為禾黍化為灰燼者豈非先世

積累之厚子孫繼承之賢耶觀於其孫仲仁可見矣仲仁字子仁急仁勇義好賢下士出於天性歷天門書院山長杭州教授江浙副提舉籍田署丞詹事翰林兩院經歷上自公卿下逮兒童走卒莫不稱其賢嗚呼以子仁之高材卓識如此際休明之運如此其有不興者乎傳曰公侯之子孫必復其始余於張氏卜之矣

題程氏譜系

古人於譜系甚不輕也漢魏以前有專門學至唐乃漸

廢耳吾姓布天下或望安定或望廣平相習相仍又何  
以知其必果哉古學不講此其一也新安內翰番易丞  
相皆其桀者廣平之宗於斯為盛而炳文又中奉之孫  
也炳文亦思光此譜乎宗人某書

雜著

西岳降獵圖

玄雲翁蒼中車一乘南轅駕牛三策而輓者二人前有  
二女子騎後有輦舁而可見者四人女子騎而從者八

前馬及執器物者十一人執仗導以北車之前儀衛續  
紛而南者其隊八二人手弓箠矢而趨騎二鞭弓而持  
矛三女子騎一臂隼驅犬于馬前執琴執器臂隼者男  
子五少前女子騎者十有四其一以孺子載其不騎而  
從者亦五二騎最先啓行並張弓挾矢而馳緋犬臂鷹  
隼而隨者各一其次一貴人騎從者十有三壺矢彈麾  
竿杖各有執也鷹四隼二犬一擾龍者一人旗六繼之  
以蛇戲者一人騎四又繼之首騎秉角以吹怪獸如狻

猊者二從者如騎之數而加其三有介者有矛者有蓋者有雲中半隱半見者不能了也嗚呼此豈屈子騷經遠遊之所賦者乎及觀平齋洪公跋語則曰西岳降獵圖也嗚呼異哉評畫者率謂狗馬難鬼神易以其茫昧不可致詰故此固茫昧不可致詰之事也而所畫狗馬鷹隼器服人物一一皆世間所有精緻絕倫有目者類能辨之非名家其孰能馳騁筆意如此嗚呼屈子以所有而託之於所無此畫以所無而實之以所有無有有

無一道也世有誑而不信者乎嗚呼盲者固無以與乎  
詭詭之觀也至元三十一年歲在甲午暮春之初遠齋  
程某書于三山憲司繡綵堂

明生樓

并序

天壽顯慶禪寺開山晦岩暖禪師架樓於東偏間  
名於白雪道人取大明生於東之義濃墨大字扁  
之曰明生樓書已合掌白佛為說偈言

日一周天宿于高春厥明曷始自東瞳瞳認東為明執



縛不通謂東匪明非愚則蒙東家之西西家之東眼入  
為幻與料想同摸日如盤盤聲如鐘聽鐘為日且瞽且  
聾我晦非晦八窓玲瓏咸池若木入我晦中宛其見樓  
在太虛空

姜清叟畫格

論畫以形似見與兒童隣固也然畫而不似何以畫為  
盖能以意求之者鮮而以形索之者多然則形意兼盡  
傑出橫生畫者以意而形其形觀者以形而意其意善

之善者也姜清叟最善於此其來也予置之烟霞泉石間半月海濱之琴當浩乎沛然其歸矣書以送之

書徐氏二女事

清淳釣臺徐氏二女也性素孝愛父師顏字子愚由太學諸生入官至元丙子家避兵于山清為遊騎所得即告其母曰我死矣以顙扣石血被面不死自投於水拯之不受竟死翌日兵又至淳驚而縊或救之蘇又自投崖下以死其父為詞哀之吾友揭此事以視予夫常人

之所甚懼者死也故凡可以得不死者何所不為今二女不懼死而懼於受辱可謂異於常人矣彼雖儒家其於舍生取義豈必素講哉而皆毅然不可奪若此素講者或返不若焉可尚也已雖然不幸而當干戈之會閭閻溝壑若二女者何限蓋其所懼誠有甚於死者然耳嗚呼

趙方塘學士哀辭

并序

天水趙晦叔襟韻高朗豈弟正直大德七年卒於

官得年六十有二非天為學士翰林非賤逢聖世  
受知明主非不達國家賻卹三子歸窆故山非不  
幸生榮死哀邈焉寡儔後三年其僚友廣平程某  
來京師顧念疇昔傷其不可復見也為辭哀之辭  
曰

緊顙蒼之御氣兮亦渾淪混瀁而不可分彼變化惆恍  
儵忽以無倪兮誠苟且因質而就文處其中曰最靈兮  
又何異乎廣野之上朝氛粲焉斐焉可翫兮執之已亡

聽弗聞三殤豈必可唁兮彭鏗非足欣惟情之攸屬兮  
固不能已於噉噉之與云云嗟江湖之留人孔力兮羌  
不察余之離羣列星睽暘以鄉晨兮夢又不覿夫斯君  
起援斗柄之低昂兮期共酌而交醺劃中道之棄余兮  
扶宰木之參雲昔者余壯而君強兮水朝宗而並湊楚  
瀨之與吳波兮有不素期之邂逅偉冠佩之魁磊兮顧  
獨衣製而短後嘒孤管啁啾以寡調兮配雲和而雜奏  
迺針芥之相獲兮契非夙而何驟盖味草木之苦甘兮

初無算於年齒之長以幼濯余河漢之秋冷兮起余豐  
鍾之纖扣觀余以文獻之故家兮息余於笑言之廣囿  
雖客食并日以不聊兮沛多聞之為富署既同而朝並  
入兮退亦接席而連雷懿昆弟之情兮通有無若昏媾  
太微清都鬱其特起兮獻替陟降於左右血奸宄於三  
寸兮聞者縮領返顧而疾走罄中誠之惓歎以剗劇兮  
咸私慮其誰救上方淵如泊如以納聽兮君亦端笏儼  
立而垂綬不欺為臣之忠兮正直神所佑雖九死而猶

生兮況聖人之在宥惟大節之靡虧感兮百行奚言之  
必又烏乎已乎不可見兮林宗碑之以伯喈之作兮尚  
彷彿其形容彼天雲之既霽兮匪北南則西以東水氣  
上兮湧涵騰渟相與仍集于太空何逝者一仆不可作  
兮猶鼓盤石之以迅風思君平生之邁往兮倘追不返  
之冥鴻抑乘六氣之辯以上征兮無所之而弗通儼鑒  
坡之基迹兮謬余布武而廁羣公詡詡猶往日兮念聆  
君話言之獨無從甚脩禱而自植兮季也尤彪外而彌

中保池鳳之一毛以永其家兮庶幾安晝夜于幽宮病  
余不聞兮既又不與送其終君既隱焉用文之兮微是  
蔑以抒余之深恫君其知抑否兮徒君蒿悽愴之集余  
衷烏乎已乎死者既莫可測知兮生者其哀曷窮

徐母吳氏誄

并序

弋陽徐覺民既葬其母二年以誌銘徵輓歌蓋孝  
子之欲報其親寧有紀極哉雖然輓則輓矣即其  
誌而誄之以答其心誄曰



延陵之淑東海之節盥笄升堂交賀咸悅如賓一紀於  
禮無闕嘻其所天云何中折有孤煢然解巾而經燈青  
夜玄松堅玉潔幼學壯行厚望寧缺三釜匪豐終報慈  
烈豈無安輿我有房闔訓以在公母嗟久別保茲天年  
往即同穴婦德母儀世教未竭於焉誅之意妍辭拙何  
以知之宰上有碣

魏國公先世述

爲人子孫介介然以光揚祖宗爲心孝之至也人莫不

有是心抑有遂不遂焉者顧其子孫所立何如耳訓有  
之母念爾祖聿修厥德蓋身立而後名揚名揚而後幽  
者顯微者著光於當時流於後世況夫世祿不墜代有  
聞人其可自同樂卻胥原默而無述乎此今平章公之  
意也一日示以先世事實欲加櫟括冀示無窮僕讀之  
曰家世河西高曾以上仕於國中位丞弼者七世曾大  
父達吉斯為其國必濟必濟者猶宰相也今贈效忠翊  
運保德功臣開府儀同三司太傅柱國追封魏國公賜

謚康懿夫人梁氏追封魏國夫人實生錫哩堪布是為  
貞獻公堪布者河西軍職也太祖聖武皇帝西征時貞  
獻公捻兵塞上知天命有歸大統當一遂首以所部歸  
國公因扈駕徂征俾與阿都齊往招沙州城中聞其來  
盛賚牛酒出迎貞獻公覺其詐促阿都齊上馬果伏兵  
四起追之阿都齊馬乏公易以已馬使先馳去自乘乏  
馬擊敗追兵而還時阿都齊已先至備以上聞上問公  
曰汝易馬之意云何汝獨無汝身耶公對曰阿都齊舊

臣也臣乃初附雖死何傷上嘉歎久之圍肅州州將錫哩都水公伯氏也欲以城內附為衆所害戕及其家城既破上命屠之惟都水親戚奴婢等一百六戶不殺及命都水子孫世襲其州達魯噶齊命貞獻公為集賽台博囉齊定宗以親王西征阿蘇欽察諸國公領壯士先登遂克阿蘇上因賜公名巴圖以旌其勇軍還太宗皇帝命公與伊瑪徹爾為伊克扎爾固齊定宗即位又命公與哈達為伊克扎爾固齊丁未年又命與伊囉幹齊

為伊克扎爾固齊治事於燕京又以大名隸御前俾兼  
大名路達魯噶齊憲宗即位頒虎符往蒞大名路至燕  
則行伊克扎爾固齊事世祖皇帝伐宋公扈征車至鄂  
州感疾上命輿歸大名就醫藥竟薨年六十二官給驛  
傳歸葬肅州先塋今贈推忠佐命宣力功臣開府儀同  
三司太師上柱國追封魏國公賜諡貞獻夫人田氏追  
封魏國夫人與公合葬實生阿魯是為毅敏公中統元  
年受宣命虎符罷職至元五年上命從雲南王出鎮哈

喇章管領集賽台及筆且齊再授虎符充雲南諸路宣慰使都元帥攻取金齒白衣緬烏蒙也可不薛等國戰功為多又以伐宋命公將雲南軍自左右江經畧撫字以功升雲南行中書省叅知政事加中書右丞至元二十四年命公南征交趾大小一十八戰多所殺獲與鎮南王合兵追襲交趾世子興道轉戰二十餘陣功常冠軍遂病瘴毒還至中慶路而沒年五十七世祖皇帝嗟愍自資德大夫雲南行中書省右丞贈銀青榮祿大夫

平章政事謚毅敏公給驛馬五十致其喪還葬大名夫人王氏祔焉令贈秉忠執德威遠功臣開府儀同三司太師上柱國追封魏國公賜謚忠節夫人王氏追封魏國夫人三男三女男曰嘉琿今為某官曰額森特穆爾今為某官曰和多都三女曰新濟曰某曰額森特穆爾僕讀已因思自古勝國之臣入仕中朝有能繼勛趾美不可謂代無其人然往往乍續乍絕若亡若存或泯焉而終以汨沒豈天道歟抑人事之未盡善也書云世祿之

家鮮克由禮以蕩陵德實悖天道然則彼之所以若是者豈有他哉令觀貞獻公家譜系秩然男女以班雖下至於百世猶可攷見即此已足以昭其人事之善又況乃出於百戰勲伐之家非世守簡編者乎誠所謂絕無寡有者宜其珪珮蟬聯益昌而大也平章公被遇三朝受列聖之眷不以身名為泰而以克紹為念源浚淵深端有未慙令者欽服上恩追榮三世世胄魏邦為國幹輔將又樹碑宰上寓印堦中永為子孫不朽之訓嗚呼



上之所以下下之所以尊尊而親親信乎各盡其道  
矣嗚呼美哉僕既為之三太息復為書之于篇而綴以  
言焉至大元年五月日廣平程某書

舍芸

莘野洪氏種學獲藝不芸而芸舍芸之義孰有爾田而  
舍爾芸我芸惟心亦孔之勤弗耒弗耜無冬無夏一日  
不芸已荒吾稼惟無可芸舍之為得勗哉莘乎自彊不  
息

古輦圖

右畫古輦一荷者百人扶者十人輦脚八人輦階十二人執仗而前者一人後者二人奉席一人蓋鹵簿圖中之一事耳惟輦乃車屬駕之以人故字从二夫起自夏后氏歷代因之至隋始不施輪而以人荷唐制七等有仙遊芳亭大小玉之號出則先五輅以行此卷未知何人其雍梁之遺歟東平王孫太常禮儀院使拜珠公出示余因叙著如右或曰尊為天子蔑以加矣其勢之

重惟天地俾之如以其身言則一車六馬足以載而何紛紛為余曰不然以天下之大而一人以身任之其視百夫荷一人孰重或者無以對迺遂記之以諗觀者

樂之昂傳

樂君者名之昂字子英世家盟津金之亡大父玉父翔舉家徙依東平嚴實實下士好客用玉為勸農官翔為廣備庫使徙居陽平遂為陽平人之昂好讀書善法律性又至孝廉直恭敏得推擇為吏歷戶刑二曹掾至元

二十一年出為長沙丞時大舉伐交趾倭軍務刻急惟之昂無所失期幕府以為能一夕夢有饋牛肉者發器骨肉離矣覺而惡之未幾母張訃至幕府聞之下令敢以喪謁告者坐之詣府涕泣請不許數月夢如初竟弃官去至武昌復聞父之喪而二親死皆所夢之夕也乃弃妻子倍道趨陽平妻子尋亦載二美女以歸遂啓窆易棺衾以葬二親面如生之昂廬墓三年幾至毀滅翰林侍講學士王構為序其事而傳之居四年徵為大農

掾後遷定陶尹政化大行民為刻石頌德用部使者薦授  
中平路推官詳讞平允獄無冤者會詔遣使巡行天下  
訪求民隱察吏能否所至多暴酷使入境吏民交稱樂  
推官之賢始甚信愛之隨以譖言羅織其罪欲以已意  
盡易獄當之昂抱牘力爭某事當某罪某事當某律吾  
寧執法而死不能矯法以生使大怒必得已意乃已之  
昂仰天歎曰天乎天子任我以刑者欲吾司平於民也  
今若此吾將焉用遂憤恚發病死時年五十六有子曰

仁曰智

太史氏曰樂仁者翰林之從事也頗能言其父事及讀王承旨構為侍講時所序長沙事而哀其情又讀李少傳謙為學士時為定陶民所撰去思碑而傷其志語曰衆口鑠金積毀銷骨今以衆人譽之而信之不足以一人短之而聽之有餘人獨何心此忠臣良士所以扼腕長嘆憤死而不顧也余故并采王李二君所載而為之傳以附忠孝之義焉



雪樓集卷二十五



欽定四庫全書

雪樓集卷二十六

元 程文海 撰

詩

次韻趙方塘

并序

積雨為沴方塘待制出長篇訟風伯憂愛之誠溢  
乎筆墨之外不鄙賜教顧某何足以知此耶厚意  
不可虛辱輒次韻一資捧腹

書生雙眉幾時開憂憤填腹長殷雷愆陽前日勢暴橫

六合幾欲炊為灰天瓢一滴不可得望望幾送日西顏  
孟水青楊類兒戲搜索旱鬼到禍胎生物斬絕有足念  
天意似為斯人回三日滂沱勢破竹羣情慰悅渴望梅  
龍休雲歸能事畢神功收歛何待催如何轉慣驕子態  
來不受輓去難推陽光一線時滲漏陰騎千陣相排壓  
禾頭生耳黍穗黑終歲勤動良可哀玉堂仙人訟風伯  
謂不肆力掃滌來嗟嗟風伯信可罪前者致旱何雄哉  
天下降兮澤上氣爾乃颼颼鼓黃埃厥令陰霾蔽天地

爾乃瑟縮不殘，摧安得皇天立梯磴，封詞直上訴九垓。  
蒼生到頭不蘇息，浸淫之虐猶燔煨。要知風兮亦何罪，  
羣陰黨互為妖災。斟酌元氣本在上，願天一正北斗魁。

又

并序

游拜長篇之貺，上下古今世變寫一念仁愛之真。  
伏讀再四，發我深省。韻嚴步窘，自合閣筆。而老天  
劃然開霽，至誠感神矣。某敢不拜謹，載賡以謝。

煤炷滿空撥不開，老虬鞭風駕百雷。暘烏旬日受掩翳，

團團一鏡埋寒灰黃流亂注山岳暗凜凜天地就傾頽  
晨興劃然玉宇淨火龍珠飛出蚌胎噴哉神機速旋斡  
豈伊人力能挽回誰知仙筆驅造化詩壇自着今歐梅  
印首奉辭叫閭闔一章未報一章催時乎雷霆轟復止  
意者有物尼其推時乎癡雲聚復散意者有物排其壓  
安知天帝不下耳聞之惻然為興哀亦曰斯民生已久  
一脉肇自開闢來九潦七旱亦勞止五風十雨安在哉  
好生自是天職分忍使變滅隨烟埃鯨生因此重有感

歷閱今古心為摧彼蒼仁愛靡不至胡乃光霽斲九垓  
欣欣熙熙能幾見憂愁嘆恨半煎煨是豈天兮不悔禍  
抑亦人也自作災安得君詩見諸事毋負老天生傑魁

題蓮葉舟圖

如此風波惡舟中坐晏如此時不經濟借問讀何書

送顏北城歸漳州

出山未了便還山見見聞聞定不凡此去人間呼處士  
曾來天上換頭銜簞瓢活計仍顏巷霖雨蒼生自傅岩

我亦征塵袍袴滿眼穿江上理歸帆

送八番安撫司趙僉事

功名成邂逅此事正多端車取富民易班封定遠難蠻  
荒今旬服吾子昔儒冠我欲歌黃鵠誰憐范叔寒

送人赴浙東木綿提舉

曾歷金華三洞天風流歷歷記山川  
柏林白綻梅花小柿實紅垂橘彈圓  
訪古但聞羊化石因君又喜木生綿  
霜風渾似當時峭愁絕雙溪八韻篇

趙菊山挽詞

九月四日卒

菊花今歲失重陽應為先生減妙香  
市駿千金惟骨在嗟麟一角與詩亡  
無人去問病摩詰有客來干死孟嘗  
我奉蒲輪猶昨日忍看丹旌遠還鄉

送茶藥與唐靜卿三首

珍重家人寄藥心將來康濟自家身  
自家性命公麼甚送與蓬萊頂上人

穀雨前期收雀舌立冬三日到燕城  
不關天上春風晚

要趁先生雪水烹

冬來羈旅無家夜雪下官人禁酒時虧殺麤疎党太尉  
銷金帳裏飲羔兒

已丑送趙縣丞世賞入官之任

父號肯堂

肯堂生此肯堂兒五葉崇蘭第一枝世賞法應為邑長  
縣丞廉不厭官卑遙知浙水扶筇老定說尊公衣繡時  
是處甘棠有遺愛郎君勉力繼前規

已丑除夜留遠齋十絕



無尋子美千間處且管相如四壁休風雨震凌都過了  
一年直爲遠齋留

無奈星翁苦見尤歲君已丑我何仇殷勤欲且留君佳  
街鼓無端送土牛

排行弟妹捧椒盤應說癡兒未了官昨日有人江外去  
家書只寫道平安

去歲金陵坊裏住踈梅的皪兩三花今年閏後花開早  
定到牆陰萼綠華

老大庭闈在盱水漂零兒女落秦淮感時懷抱思親甚  
料得吾兒說遠齋

何年呼得竈為君鼻是烟窓耳是鐺深夜乞靈余不會  
但令分我膠牙餠

鍾馗曾是開元見從此人間鬼日多明是將無來作有  
撐眉努目奈人何

今年悟得修真訣巷柳園桃一併無却笑塵緣終未斷  
杜詩韓集當麻姑

都無柏酒與椒盤止有年華上鬢端一盞油燈充蠟炬  
夜深炯炯寸心丹

十載班行沐異恩歸來未望屬車塵  
萬歲聲中拜聖人

題劉須溪徐容齋所贈按達拉吉琳御史名字  
說後

謹嚴書法須溪筆說到容齋渾渾哉名字而今俱典雅  
只消功業上雲臺

辛卯九月行臺解組西歸十四日泰州教授適齋胡先生送別真州是日乃先生初度

滿江風雨太多情送了重陽送我行祖帳遠來慚弟子  
壽觴初度喜先生功名千古文章印師友平生父子盟  
遮莫萼蘆堪久戀雞豚只合社吳城

廿一日過建康送朱楚翁教授當塗

男兒自合致青雲天上何須問故人選部四年無力輓  
除書萬里待身親司文鄭校官寧冷迎侍潘輿地却鄰

去去新篇定驚我采江月夜有詩神

廿四日偕包鼎新吳岩翁登蛾眉亭

牛渚磯頭看落暉亭荒檻折怕憑危江山欲暮涵元氣  
舟楫無風玩小兒百怪可堪重出世雙蛾安得顰開眉  
酒澆不到青山土應笑新詩有許悲

天門山

萬里瀾漫地天門據要衝乾坤大開闢江漢此朝宗往  
事空多壘千年只二峯舟人亦癡絕遙認兩眉濃

連日飽飫嘉魚示包吳二君及陳孟實甯志道  
江行日日侶漁郎風味中含翰墨香巨口細鱗蘇赤壁  
槎頭縮項孟襄陽杯盤喜具雙魚美詩賦慙無一字長  
賴得此身逃吏責素餐只是欠文章

十月四日過兩孤山

兩山相望幾曾孤應是高峯不可梯千載何人廟雙姥  
我評只合祀夷齊

過湖口

瞬息風帆湖口縣山川便自帶鄉情孤峯蒼翠嬋娟老  
二水青紅蟠螭明江自西來尤可愛波隨東下直能清  
吳城見說明朝到山下青青是祖塋

風帆迅甚今夜徑宿楮溪渡有孤鼎新遊匡廬  
清興詩以解之

清遊有約到廬山到得廬山風作難三老狡謀捎楮渡  
雙帆盡意度揚瀾紫烟斜日空相照白鹿他年許再看  
世事心容輒相左請君方寸與君安

六日到吳城山

過家上塚一留連風景依依故可憐自嘆蒼顏如此樹  
偶逢老父使之年趙灘綠是幾時長廬阜青還萬古鮮  
却恐錢郎笑寒乞只將詩句裏山川

贈汪郎中

此老今年八十三江濱獨擅漢衣冠文書銜袖龍蛇字  
鬚髮如霜熊豹顏耆舊于今足塵土典刑留此重家山  
醴牢略具高年禮萬一神丹乞九還



余解官歸省舟過吳城山下耆舊彫落有慨其嘆忽  
老人厖眉皓髮衣冠偉然惠詩一卷使之年曰八十  
三矣復遺瓜三枚不一語而去余意其異人也坐有  
潘俊卿謂余曰此廬潭老人汪郎中也屬余西泝未  
暇細論令人餽之羊酒將以此詩至元二十八年龍  
集辛卯十月十日

至洪王肯堂治書見示芙蓉詩次韻二首

春風馭桃李秋雨深莓苔蕭然公館間得此奇種栽九

天清露零一道紅雲開勾牽綠衣隊酣宴瑤池盃穠粧  
月鑑懸麗服霜刀裁瑞蓮湧平地妙色分五臺暫陪飛  
仙游偏稱幽人懷終疑閬苑去嘉會何時諧此日眼雙  
明臨風漫低回長當歌楚騷招得花神來

幽居有佳人頰顏暈紅玉飽承仙掌露晞沐蔓髮曲一  
望西風塵倚竹翠袖拂閒臨清水照靜對遠山矗向來  
涉江人見謂江成陸楚楚靈均裳貯麗為誰鬻惟應妙  
手畫掛壁薄夫肅后皇植衆芳艷艷列金屋詎知漆室

憂不在春睡足結言遺吾相高舉郢書燭

徐容齋參政王安野治書更倡迭和飲酒止酒

各極其趣次韻二首

推蓬誦公詩窺豹乍披霧信知醉鄉後一一克自樹向  
來胸塊磊澆灌不停駐至今傳衣記燈燈續前炷時因  
太和湯縵出繭絲句從教馬為牛而況作與鼻至人全  
於天此是酒中趣吾家伊川翁言行極稽慮當時半醺  
意所得各有處欲辨言已忘公眠我姑去

右飲酒為安野公賦

渾家醉眠時孤城黯酸霧十年江左恨遺曲傳玉樹從  
公淮海上弔古馬遙駐夜歸證前史繞几黃雲炷竭來  
高士州止酒誦佳句方此尋歸途短褐困騏驎諸公羅  
俎豆排日得深趣覩余乏剛制肆口弛防慮三復童殺  
章放心有歸處林田亦何須淵明故山去

右止酒為容齋公賦

題九方臯相馬圖後

并序

至元辛卯秋杭張師道寄余此卷是歲十月會安  
野侍御于洪臨岐出此以當贈策就題廿字

萬里出市駿九京誰作歎多因毛色似誤殺眼明人

家園見梅有懷疇昔同僚諸君子因成廿六韻

奉寄徐容齋王肯堂趙元讓暨正父文瑞諸

公

往時姑射仙夜墮江南村江南富嘉植梅花衆中尊九  
地悶玄凝先天占春暄的皪冰雪姿不受風塵昏孤清

愜幽意賸馥醒吟魂愛之玩不斃冥契終無言羅浮本  
幻境前夢覺已謖蹇蹄滯京華倦翼棲淮垣後先青雲  
士表裏白玉溫我形自覺穢交道久逾敷貞節保松柏  
芳心共蘭蓀信知歲寒友何異連枝昆獨賢天所矜家  
山問雞豚歸來適仲冬平旦窺荒園依依故人面竟日  
對傾樽清池踈蘂影淡月新梢痕冷然絕埃壒恍若遊  
崑崙忽憶如花人高談霏露繁眼中不可見思燾風翩  
翻頗慙標致似遠近殊託根洪鈞轉嚴令青皇畀新恩

坐看佳實長適口塞衆喧遍遺實中仁生意彌乾坤平生識賞心皎潔明朝暎凌寒折一枝殷勤寄王孫又恐遠莫致作詩當重論

壽吳幼清母夫人

十一月廿五日

清時富貴亦易得吳子甘心卧草廬慈母自能安菽水  
高年忍使倚門閭此時為壽奉卮酒豈必閒居耍板輿  
却笑毛家兒子俗區區喜色動除書

送前玉隆副宮嶽麓劉蒼雲

官已我方來問道道成子却去為官出山不為功名在  
有眼要知天地寬定力千年衡岳峻浮生一葦洞庭寒  
玉函只在游帷近何日歸舟覓剩丹

余秋山憲使挽詞

薦橐因君重古靈官衙何事上銘旌西山大學曾經進  
涑水深衣儼若生江右澄清方有意長沙卑濕竟無情  
韓公賴得門人在文集千年以序行

試傳崇陽墨二首



三生筆硯有良緣與子交游四十年吾亦少恩忘子報  
安排佳語傳陳玄

商家良相命三篇學字真開萬世先雖誦長謳傳不泯  
客卿有藝更光前

刻字熊生

精藝令人注意深斯文百世得追尋伏經口授終非古  
周鼓體訛猶至今子已萬言歸一默誰知隻字抵千金  
鉛刀可是傳心具有畫無心畫是心

三十六代天師挽詞二首

雞犬曾聞舐鼎餘一朝形化豈神俱  
千年漢日王章在萬里燕雲錫命殊  
政此天仙司下土遽之帝所宴清都  
嗣師入侍金壇側生死榮哀近代無

龍虎山齊浩劫灰胡然夜半失崔嵬  
有言白鶴東歸者何許青牛西度哉  
騎氣一朝成獨往吹笙千載尚同來  
拍肩挹袂噫難再遠托長風送一哀

送留道士

樂得清閒了此生青鞋布韉尚探尋  
岩巒謾寄孤雲影  
霄漢常懸野鶴心  
幸破樊籠天廣大  
豈無泉石地幽深  
他年心迹雙清了  
更覓新詩為子吟

題趙仲遠伏生授書圖

龍鍾九十餘猶及漢三葉  
哀哉窮獨叟有女幸傳業  
授教纔四七錯歸已德色  
遂令讀書人終古猜梅賸

送王子厚

并序

王子厚以醫名家六世矣與余家聯姻  
姪在郢同

居里去郢同寓里別二十年余將造朝過吳城為  
仲父宣慰謀醫鄉人合而言曰有名醫在都昌亟  
命舟迎致則吾子厚也切脉如見用藥如神信乎  
名不虛得臨別賦此

高談稷契不謀身作計岐黃自活人六世名家孫肖祖  
萬金良藥衆疑神傳來白雪千年調散作青雲五老春  
若遇無形可憂處未須驚走且逡巡

次韻肯堂學士冬日紅梨花二首

黃菊卧階雨六花舞天風壁凍室生白手僵肉作紅秀  
句忽墮前光怪侵簾櫳至人宴坐處元氣含冲融無情  
及枯株嫣然為脩容坐令玉華君來從藥珠宮麗粧凝  
祥雲明眸轉驚鴻豈非散花手試君情所鍾老我嗜好  
淡空詩亦雷同祇願酌花時毋忘北隣翁

傾蓋幾何年黟俄半雪寧有結願香復此共朝闕去  
年賦芙蓉佳句動江浙我時增意氣未覺老衰歇新詩  
出懷錦酒酗劇眼纈今晨豈玄冬草木爭簡潔東閨別

種花紅芳忽漏泄天工變化手誰能料時節要是文字  
祥因緣為君結開樽當嚼之和露餐玉屑典衣勿踟躕  
無花嘆空折

題肯堂學士遂慵軒

東臯記醉非真醉安野標慵豈必慵頗憶吾家伯淳語  
閒來無事不從容

樂山

劉東厓學士為唐承旨立號

不受東華一點塵青青靜閱幾番春朋儕欲表公心事

只有西山象得真

覃懷宋氏義門

東厓作序

清朝恩渥新旌表玉署詩文互發揮從此義門聲價大  
兒孫莫遣古風微

送趙月卿教授江州

六館才名三十年冷官還取舊青氊不辭越水遠千里  
要看廬山障百川栗里風流今在否濂溪源委故淵然  
乾坤生物無窮盡鮮有鸞膠續斷絃

送三山陳格山教授高郵

師儒不比他官職太息難逢本色人  
覆盎一城如斗大臬比重席得儒真  
宗門况味從來冷近日詩書漸可珍  
淮海秦郎天下士試尋恐有再來身

富州教授馮君茂叔蜀珍也將之官出涪翁所  
書隱求二字索賦

身隱何求更入思山人解有出山期  
君民位置耕莘日禮樂規模陋巷時  
遠志不為安石小北山一任德璋移



冷官未必埋藏得定有龍光出劍池

送月浦鄭貴道教授揚州

衆芳搖落士林嗟喜見先生兩髯華問道曾為諸老客  
亢宗元是廣文家典刑四柏亭前樹聲譽蕃禧觀裏花  
玉署即令重人物冷官何得久天涯

瘍醫三茅蔣法師

輦路逢醫捻上醫到頭誰與問瘡痕隱居昔住茅君洞  
靈藥新傳蔣法師術妙鵲鍼投血脉衆疑獺髓補膚肌

藥錢不辦將詩準詩病依然欠事治

送陳笠峯

并序

笠峯陳君教授紹興有聲秩滿謁選僅得舒州教授以歸士論稱屈笠峯怡然曰是豈不可為哉將行養蒙送之以序盡之矣廣平程某故永歌之

笠峯前在會稽時教授堪為教授師弦誦幾曾一朝廢宦情頓起百年衰丈夫得志是行已廉士居官不厭卑去去舒州寧久滯玉堂學士印心知

輔正臣按察使挽詞

中原耆舊令餘幾天奪任南有底忙閩嶠淚碑生叔子  
孔堂尸祝死庚桑公言從古出鄉校興誦傷心入些章  
福善依然銖兩定照人丹桂一枝芳

送程萬里尹曲江

縣尹官卑亦名宰曲江邑弊尚堪為溪頭香水有佛性  
江上青山似舜時韶石鳴琴應古澹禪閑得句定新奇  
是中人物多名世試問張余今有誰

吳進學挽詞二首

已恨相知晚如何忽棄予十年只私第一剡始公車知  
為人才計遑思功令書可驚生世短揮涕重踟躕  
所謂溫如玉于今有此人家庭三代意襟度四時春幾  
月文園病何方圓澤身欲求難再得西望暗傷神

送景星山長吳此民謁選

古今通顯途十五戾契致嗟余就衰懦羨子方猛銳手  
提青冥鞞欲厲黃河水明時急需材諸老虛席俟

寫真吳若水

畫手吳生妙如今豈後身知人古未易下筆爾能親顏  
貌隨年運風流落世塵若為傳不朽千載會如新

送胡適齋先生教授瑞州

大冶平生鑄金手千莫鼎彝隨質就蕭騷霜髯海陵風  
兩眼眇昏數科斗陋邦文采狸豹變潮永他年說韓柳  
天官銓材定銖寸還我耆儒善江右高安道院士素淳  
近來與化移易否安定傳家教條在培植嘉生待新樵

莫言冷官只文字錢穀簿書更紛糾幾何出入漫不省  
詭對未宜師戶牖韋編一束當韋佩大耐規模當大受  
此日沙頭一盃酒先生東下僕南首坐看安定門人多  
四海同風軼嘉祐

和王寅夫郎中元日立春二首

馬蹄塵裏度芳辰帶得陽和到七閩山翠倚天迎好客  
風光滿地屬吟身高情古柳仍青眼時態天桃自絳唇  
從此不憂江海遠春官袖有十分春

聖德如天氣序調立春元日兩相遭陽和忽送千林喜  
天關遙瞻萬里高詩酒風流憶諸老簿書塵土愧吾曹  
焚香覓句多閒雅旅思絲棼得孟勞

寅夫惠顧公宇適有倉庾氏之役不得晤語明  
日武仲經知事攜示寅夫登樓佳句用韻以  
謝不敏

皇皇使節下青冥談詠登樓尚典刑人物山川增壯觀  
文章河岳炳英靈浮雲過眼紛紛白遠樹涵窓隱隱青

我亦登臨興不淺此時應是避文星

倉中兀坐憶寅夫雨夜佳篇用韻呈似

唱籌聲裏過新元準擬崇墉大有年  
午夜淋漓聽雨響炎方枯槁解民懸  
老梅謝事留青子稚麥乘時漲綠烟  
佳句聯翩與春競幾宵諷詠不能眠

日與寅夫約登鼓山二月十一日竟獨往而不  
我告繼聞是日乃寅夫初度即事為壽

朝天笏挂西山頤忽此來窺南海竒平生亦有觀山癖



已約同題石鼓詩誰知青雀啣桃至竟着先鞭了不知  
東望蓬萊半明滅想應獨受長生訣天風海濤萬里寒  
高人題扁知未漫眼中定有驚人句我今想像何能賦  
佛成靈運誰後先重期一指蓬山路

題武仲經知事獅猫畫卷

金絲色軟坐常溫飽食深宮錦作墩若使爰書無法吏  
詩人應嘆鼠翻盆

獅猫盖舊時禁中所養好潔善饒而不捕鼠吁養猫

所以捕鼠也以捕鼠為職則目不停伺爪不停攫庶  
幾無負所養者是猫也褥溫而坐安毛澤而體肥養  
之者至矣而澹乎若無營焉所職何如哉豈無崔祐  
甫乎將執筆以議

次疎堂中丞詩韻

并序

潘景梁出示中丞疎堂公贈言細讀之有味哉仁  
人之言也紙末見及深佩不遐遺之盛心因風敢  
次韻以謝

漆園物外人是非一槩齊冥心兩忘辯玩世鄰滑稽淫  
辭懸崖險一陷莫可躋吾徒自潔白粲粲毛與西庶以  
厲頑薄勿俾傷孩提廓然公好惡於斯見天倪清談寢  
成風可否幾謬迷飢溺不關心誰其拯顛隲哀哉延頸  
民萬目徒睽睽有嚴踈堂公澹約甘朝藿贈言教戒備  
居要磨有臍潘侯持示余溫潤獲琬圭維彼不比鍾左  
右殊高低徇激等一偏詎可航且梯蹇余惕瘵曠凜若  
臨深溪公言真菽粟致遠終當齋投身暫是炎燠每憶寒

風淒公能隨器使儻似蹒跚奚

次徐廉使贈潘僉事詩韻却寄徐公

持節南閩遠帝庭每懷東魯舊儀刑讀書至老眼如月  
憂世常多髻轉星興到湖邊增漲綠詩來物外見空青  
于隅有唱不易和小知閒閒愧大寧

寅夫惠教遊鼓山四詩細讀如在劣前杖屨間  
想像追和用堅重遊之約

城市林泉隔幾關半生幽興欠閩山久聞劣前高寒處

一望蓬萊縹緲間有約同看紅日上無端獨占白雲閒  
錦囊收拾奇觀了物色分留肯破慳

足力猶堪敵瘦筇擬乘寺頂最高峯杯吞東海一勺水  
鞭起南湫久卧龍佛界須臾三萬劫神仙杳靄幾千重  
煩公更泚如椽筆摹寫雲天不盡容

炎方春淺未如焚花木迷人意欲曠福地同遊勝獨往  
中天一覽破千聞于今難擬高唐賦何日重開衡岳雲  
眼底流求彈丸耳樓船曾見漢家軍

去天萬里此相遭攬轡無功敢告勞  
賸貯冰霜消瘴厲尚疑風雨隔清高  
一年花事成佳蔭二月春江息怒濤  
細嚼公詩如橄欖挽回塵俗入風騷

楔前一日西齋小酌立道有詩次韻奉酬

誰解恹恹誦德音樽前喜識舊纓簪  
頗矜此客吾能有一見交情如許深  
久耐好看青荔色旋栽未展綠蕉心  
醉中狂語疑多謬記錄何堪託彥霖

次韻寄謝建昌監郡

京國歸來歲告成使君一再及前榮每聞美譽中心喜  
况見可人雙眼明公事餘閒詩味永要官雅澹俗流驚  
遄驅頗覺從容少千里緘辭續短行

次韻寄謝盱守

學道生平慕廣成過家將旨若為榮曾憂霜後堅冰漸  
得遇雲間皎日明人事變遷終有定吾心寵辱本無驚  
風流太守情何厚飲至渠渠更贈行

次韻寄謝盱江學院諸先輩

半生事業竟何成  
冷笑猶然愧宋榮  
日逐黃塵雙袂暗  
夢回綠幙一燈明  
交情欸欸知君厚  
佳句翩翩使我驚  
皓首相期崇令德  
殷勤遠寄白絲行

呼喇美御史還臺索詩二絕為別

曾此觀風慣土風  
老榕能識舊花驄  
如何又踏秦淮月  
不待炎州荔子紅

耆碩堂堂集柏端  
定應問俗及閩山  
為言部使無功狀  
減却吟詩一半閒



寅夫示再登鼓山四詩僕雖不獲同遊然來詩  
不可虛辱次韻奉謝且致歸班之餞

大壑厓邊覆小舟摩挲舟腹得舒憂山神何意迴吾駕  
客子逢春負此遊靈運一時遺鴈蕩少陵千古擅牛頭  
且看平地亦不惡暖日晴風麥隴秋

勝處心知只耳聞却因君句得奇芬海天昏黑龍行雨  
樓閣青紅蜃吐雲仙境烟霞從痼疾詩家風月要平分  
悠然佳興誰能敗俗吏當前自糾紛

眼前培塿足縈纏去去瀛洲大洞天一息南溟能幾月  
再行東海定何年江淮巨浪千堆雪榆柳中原萬里烟  
鮮視歸裝還不俗有詩曾酌瘴鄉泉

我亦脩持不動尊少曾一跡印空門居然慧力照法界  
即此深心報佛恩有道臨民只清靜無塵到慮儘囂喧  
公餘更得新詩和洗盡人間種種煩

四月之六日是為遂良經歷初度乃避客于聖

泉寺寅夫有詩因賦五言為壽

此君真益友爾吏得嚴師松柏羣稱壽  
莪蒿獨廢詩聖  
泉尋淡味佛界受清規我亦代說法脩行在勿欺

建寧醫工提領虞益之謁予三山出館閣諸公

詩文欲得予語為賦五言

絡從兩馬去帶取五禽還何意求榮達微身備險艱為  
齊太倉令入漢玉門關會有憐君者田園復故山

次韻寅夫晚涼感事

初夏微風作嫩涼傷春一夜鬢毛蒼紅芳寂歷午陰綠

白晝須臾晚照黃  
濺淚露葵空  
滴滴鎖愁烟  
柳自行行  
絕憐熠燿倉庚羽  
曾帶千門麗日光

生綃團扇十將以五十六字奉餞譚公植提學  
謁告顰歸

君留南嶠兩經春  
愧我茲遊落後陳  
今夏相期同食荔  
先秋何事忽思尊  
團團明月隨歸路  
處處清風認故人  
休戀小山幽桂好  
重來要及菊花新

次韻韓明仲教諭

日力縻三尺風聲繫百司中年勞作吏累月懶吟詩  
衮只如此悠悠何所之可人佳句在每誦輒移時

羅山長用曾留畊僉事二詩韻見貽次韻奉荅  
半歲觀風熟越山頗驚機事等黃間昏昏書牘煩填委  
落落詩筒缺往還郢曲高低渾欲忘越人喜戚正相關  
只應拙默差強巧不厭天孫賦授慳

此士堂堂早覺奇品題合入外孫碑都亭司馬

羅居城外今

容與湖海元龍舊夢思一世才名終有實千年事業可

無詩古人羈旅猶堪忍會見鳴機織素絲

鼓山閩之望湧泉寺之勝有二美焉寅夫凡三  
遊而僕未一至每遊賦詩必四不鄙下教祇  
益吾愧次韻奉酬

不辭使節滯甌蠻贏得期程飽看山成佛誰教遜靈運  
上人今復遇高閒詩盟未冷宜尋載禪鑰雖嚴許叩關  
到底內觀更奇絕只消面壁了區寰

貯來胸次爾多春詩境長隨眼界新氣至再盈渾未竭

計成三顧不為頻雲間屢宿犬能識海上熟觀鷗亦馴  
豈是逃禪忘歸意定應法喜賽如賓

韓公嶺海杜夔州轉覺篇章興味幽試問何人聽白雪

敢教此客卧朱樓

寅夫時寓朱府樓借用對

眼花自眩蘭苕翠心地

不驚稊稗秋頗恨南音尚啁哳期君邊幅制橫流

薰風景候雨冥冥壬癸居然勝丙丁五日尋常賜衣節

三人瀟洒望州亭亦思奇觀供吟筆苦泥清齋隱內屏

却把來詩容易和二分聲響八分聽

次韻趙弘道僉事見寄

熙朝新渥及瘡痍臣子孤忠誓不移千載清風留瘴海  
一心皎日報明時已嗟聯事相逢晚要乞閒身更願遲  
君獨行勞吾坐嘯多慙民瘼未周知

奉餞寅夫使歸

王君世儒雅不厭州縣勞一持秋霜簡徑署春官曹平  
生風月懷筆勢江海濤青冥使節下跋履閩嶠高兀鞍  
了古今滿目餘詩騷盤桓無諸城歲月驚滔滔寒梅昔



飛花暗柳令鳴蜩繼明瞻日馭歸觀馳星軺愜余定交  
晚傾蓋如久要君行勿遲留耆俊方盈朝

行省賈掾母劉以貞節表門閭寅夫有詩因題

其後

婦人謹三從生死不二天鄙風風已變而有共姜賢去  
古益以遼卓行同貞堅清朝厲薄俗令子貴俱傳柏舟  
二千年吾作刪後篇

次韻張道判

有客遊方外從容問所如  
口哦五字句手授一編書  
為看東溟水潛回西極車  
蓋公經濟略應笑賈生踈

次韻奉餞傅岩甫歸院

別後流聲落耳間  
炎風何許駐旌干  
種花往日洛陽句  
食荔今朝海上山  
舊事見前如泡影  
新詩向老更波瀾  
多君脩得鑾坡福  
尚有餘丹乞大還

久晴方欲禱祈仲經知事出平遠亭途間遇雨  
之作次韻二首

海田將陸擬箋天海水何知有旱年帝念民貧欠蘇息

一時風雨散飛錢

海陵黃尋家先貧困大風雨散飛錢至其家後富至數千萬

辨獄無冤可動天真卿事業在他年

顏真卿為監察御史使河隴時五原

有冤獄久不決天且旱真卿辨獄而雨人呼御史雨

此時避暑山亭意應笑岑公

眼見錢

岑文本山亭避暑有人叩門云上清童子元寶冠青圓角冠衣淺青衣問其冠服答曰僕外服

圓而心方正上清五銖服也言訖出門去至墻下忽不見岑使人掘之一古墓中得一古文錢

雪樓集卷二十六